

Lwglungz Sauqmoh

龙子扫墓

□ Banh Singhaij / 潘星海

Seizgonq laj din Byacwx miz aen mbanj iq ndeu, ndawmbanj miz mehmailaux ndeu, de youq aen ranzhaz iq youh gaeb youh rwix, mbouj miz saek benq reihnaz, ngoenznaengz hwnj bya bae raemj liu ma gai gvaq saedceij.

Seiznit miz ngoenz ndeu, mehmailaux hwnj bya bae raemj liu, gwnzbya rumzbaek cifofo, caiq roengz mwi, nit dwk din fwngz cungj geng liux. Sawqmw, de raen laj gofaex miz duz ngwz iq ndeu, yaek dai lo. De sim' in duz ngwz iq neix, dawz duz ngwz iq cuengq haeuj ndawrungj, duz ngwz iq ndaej heiqraeuj le couh menhmenh doenghnyepnyep. Daj seizneix hwnj, mehmailaux couh souciengx duz ngwz iq neix.

Duz ngwz iq yied ciengx yied hung, gig vaiq couh bienqbaenz duz lungz iq ndeu, diuz rieng raezrangrang, haeuj ranzhaz iq diuz rieng lij iet ok bakdou bueng ndeu. Mehmailaux naeuz de, danghnaeuz mbouj raemj diuz rieng, de couh mbouj ndaej haeuj ranz lo. De gig dingqvah, hawj mehciengx gaem cax raemj gat diuz rieng. De mbouj miz rieng le, vunzmbanj couh heuh de guh Daeggaed.

Gvaqlaeng, Daeggaed ngoenz beij ngoenz bienq hung, aen ranzhaz iq youq mbouj roengz, mehciengx couh youq henz ranz dap aen diengzhaz hung ndeu hawj de youq. Vunzmbanj raen de youh hung youh sang, naeuz de dwg duz fangzyak ndeu, baezlaeng haih vunzmbanj dengnanh, heuh mehciengx de boeng de deuz, mbouj deuz couh dwk dai de. Mehciengx

gyaez de dangq lwgaen, daiq de senj hwnj gwnzbya bae youq, doeklaeng de bienqbaenz duz lungz hung ndeu. Mehciengx naeuz de: "lajmbwn miz haujlai vunz souhnanh, mwngz mbouj ndaej gag goq mehciengx, yaek bae gouq gyoengq beixnuengx souhnanh lajmbwn." De sij mbouj ndaej biek mehciengx, ngeix daengz mehciengx buengsei q sinhoj cij ciengx de hung, caengz ndaej bauqdap mehciengx, baenzlawz ndaej couh yienghneix deuz ne? Mehciengx gienqnaeuz: "Bauqdap gou dwg gienh saeh iq ndeu, gouq gyoengq beixnuengx souhnanh lajmbwn cij dwg saeh hung, mbouj ndaej gag goq bonjfaenh, yaek ngvanh baenzlawz coengh gyoengq beixnuengx lajmbwn ndaej gvaq ndwenngoengz bingzan vuenyungz." De dingq gij vah mehciengx, mbin hwnj gwnzmbwn bae hen diuz dah hung, bienqbaenz duz saenzlingz hen diuz dah hung, vih vunzlai lajmbwn bauj bingzan cauhfuk.

Vunzmbanj ienqhoij baezgonq guh gij saeh mbouj deng, hwnj bya bae cingj mehmailaux dauq ndawmbanj. Mehmailaux gaeng ndaej gyaue bak bi lo, de yaek dai seiz, vunzmbanj cam de: "Baenzlawz heuh Daeggaed dauq?" Mehmailaux naeuz Daeggaed ngoenznaengz vih vunzlai lajmbwn bingzan vuenyungz feiqheiq, gou dai lix gij saeh iq neix suengq maz ne?" Daengz ngoenz dai de, gwnzmbwn rumzhung cifofo, byaj raez yienghrumrum, fwn doek raq sajcaca. Yienzlaiz dwg Daeggaed ganj dauq, dawz mehciengx soengq hwnj gwnz dingj Byacwx giengq byasaem ceiq sang bae cangq. Doeklaeng vunz

bonjdeih gingqcungh mehmailaux caeuq Daeggaed, cwnghueh mehmailaux guh Mehlungz, cwnghueh Daeggaed guh Lwglungz, giengq byasaem cangq mehmailaux couh heuhguh Byagyauejlungz.

Lwglungz baenzneix doiq mehciengx miz hauqsim, gwnzmbwn goeng Nyawhdaeq rox le gig doenghsim, daengz ngoenz dai Mehlungz, couhdwg liggaueq ngoenz sam nyied cosam, hawj de dauq Byacwx sauq moq baiq Mehlungz. Bi daengz liggaueq ngoenz sam nyied cosam, raen gwnzmbwn byaj raezrumrum, gwnz Byacwx rumz hung fwn doek raq, vunzmbanj couh naeuz dwg Lwglungz dauq hawj Mehlungz sauqmoh lo.

Vunz bonjdeih baiqfug Mehlungz

caeuq Lwglungz, moix bi daengz ngoenz liggaueq sam nyied coam, couh ciuq gij saekhoengz, saekbieg, saekhenj, saekaeuj, saekndaem haj cungj saek duz lungz gwnzndang cimq haeuxcid naengj, yungh haeuxnaengj hajsak baiq Mehlungz caeuq Lwglungz. Baiq sat Mehlungz dem Lwglungz le couh gyonjcomz laj din Byacwx hwnzngoengz eufwen. Cungj fungsug neix bi doek bi, gig vaiq couh cien daengz Mbanjcuengh Vujmingz gak dieg, itcig daihdaih ciepswnj roengzdaeuj daengz seizneix. Seizneix Sam Nyied Sam Bouxcuengh hawfwen Vujmingz gij goek de, couhdwg daj neix ginggvaq cien bi bak bi lienzdaemh ciepswnj roengzdaeuj lo.



Gyoengq dahsau daegmbauq Dungcuз daenj buhvaa
gyaeujndei comz humx dwk youzcaz. Vuz Lenzyinh ingj

82. Doek bae lumj duzreiz,
Gip ma baenz aenbeiz.
(Ndaem byaekgat)

83. Faggiemq song mbiengj rae.
(Mbaw'em)

84. Gijmaz daenj mauhfaz,
Ngoenzngoengz ra gwn namh.
(saenaz)

85. Gijmaz song gyauej soem,
Roengz fwn de couh ok.
(Duzndwen)

86. Duzgoep youq congh rin,
Rumz fwn de rox heuh.
(Aekex)

87. Ndag mbouj miz ndok,
Rog mbouj miz nyinz.
Gwn boux vunz ranghlix.
(Duzbing)

88. Aen ceuj youq bangx naux(bo),

Vah Duenz

谜语

□ Soucomz Cingjeix Veiz Daz

Fwn doek laux mbouj rim.
(Rongzroeg)

89. Cibngeih duz mou iq,
Daeuj henzrij gwn mok,
Imq youh rueg,
Iek youh gwn.
(Loekraemx)

90. Sau:
Bouxlawz caux aenyienz raeuz nduj?
Bouxlawz caux duhyoux raeuz gonq?
Bouxlawz caux mbonq ninz gyanghaemh?

Bouxlawz caux daengq naengh gyangngoengz?
Bouxlawz caux ranzdoz yietnaiq?
Bouxlawz caux dazfaiq daemj baengz?
Gizlawz caux ranz cunz guh saeq?
Bouxlawz caux bakmaeq geuxndaeu(maklangz)?
Bouxlawz caux song raeuz vuenh domq?

Mbauq:

Ingdaiz caux aenyienz raeuz nduj,
Sanbek caux duhyoux raeuz gonq,
Duzsien caux mbonq ninz gyanghaemh,
Bouxsaeq caux daengq naengh gyangngoengz,
Roeng gyaе caux ranzdoz yietnaiq,
Yahgeq caux dazfaiq daemj baengz,
Gyang nganx caux ranz cunz guh saeq,
Cuihgongq caux bakmaeq geuxndaeu(maklangz),
Samcej caux song raeuz vuenh domq.

(12)

